

## **PENGAJARAN DARI ASHABUL KAHFI - DIMANAKAH HALA TUJU JATIDIRI PEMUDA BANGSA?**

Oleh: The Six Phoenix

Dalam surah Al-Kahfi, Allah SWT menceritakan tiga kisah masa lalu, iaitu kisah Ashabul Kahfi, kisah pertemuan nabi Musa AS dan nabi Khaidir AS serta kisah Iskandar Zulqarnain. Kisah Ashabul Kahfi mendapat perhatian lebih dengan ia digunakan sebagai nama surah dimana terdapat tiga kisah tersebut. Hal ini tentu bukan kebetulan semata, tapi kerana kisah Ashabul Kahfi, seperti juga kisah dalam al-Quran lainnya, bukan merupakan sebuah cerita hiakyat semata-mata, tapi juga terdapat banyak pengajaran (ibrah) didalamnya.

Ashabul Kahfi adalah kisah dimana 7 pemuda beriman yang hidup dizaman pemerintahan Raja Diqyanus (Decius). Raja Rom yang kufur ini memerintah negaranya secara kuku besi dan zalim. Barang siapa yang menentang pastinya seperti menempah kematian awal. Raja Diqyanus juga memaksa rakyatnya untuk turut segala kehendaknya termasuklah untuk menidakkan perintah Allah SWT dan berlaku murtad.

Rata-rata rakyat yang amat takutkan azab pemerintah zalim ini terpaksa menurut segala kemahuan sehinggakan mereka lupa kepada azab Allah yang lebih nyata. Namun begitu, Allah SWT hadirkan 7 pemuda yang berjiwa kental yang berani menegakkan panji-panji tauhid.

Keyakinan pemuda-pemuda ini kepada agama tauhid itu akhirnya diketahui oleh raja Diqyanus. Maka dipanggilnya pemuda-pemuda ini untuk menghadap raja. Dihadapan raja zalim ini, 7 pemuda tersebut dengan berani dan petah berhujah mempertahankan iman dan prinsip mereka.

Biarpun Raja Diqyanus dan pengikutnya gagal untuk menghadirkan jawapan yang pasti kepada persoalan mereka sendiri, namun sang pemerintah itu kekal tegar untuk mengeraskan hatinya dari mengimani kata-kata pemuda-pemuda tersebut.

Demi menjaga reputasinya, maka sang Raja menitahkan untuk menjatuhkan hukuman mati terhadap 7 pemuda tersebut. Pemuda-pemuda tersebut lantas bertindak keluar dari kota dan menyembunyikan diri disebuah gua di pergunungan Nikhayus.

Maka, ditakdirkan Allah SWT, pemuda-pemuda ini tidur selama 309 tahun. Dan apabila mereka sedar, mereka tidak lagi berada didalam sebuah kerajaan yang zalim, bahkan Allah telah kembalikan mereka disatu masa dimana agama tauhid itu diamalkan dalam suasana yang harmoni.

Keyakinan dan keteguhan prinsip pemuda-pemuda Ashabul Kahfi ini bukan saja baik untuk dijadikan teladan kepada pemuda pemudi kita pada hari ini. Bahkan mereka

layak dijadikan contoh idola yang keras memperjuangkan kepercayaan mereka tanpa perlu takut kepada ancaman lain.

Dizaman ini, cabaran kepada pemuda pemudi kita amat besar. Kebebasan dan kemajuan teknologi hari ini bukan sahaja membantu, malah boleh juga dijadikan ancaman kepada pemikiran pemuda-pemudi hari ini.

Khabar berita yang berlegar di ruang maya sepatutnya menjadi ramuan berkesan bagi menambahkan ilmu pengetahuan. Namun begitu, kebenaran terhadap khabar tersebut menjadi racun yang tajam kepada pemikiran mereka.

Anak muda kian hilang jati diri, malah dengan sikap memberontak yang sedia tertanam dalam diri insan bernama remaja itu membuahkan satu pola untuk menolak kebenaran.

Pemuda pemudi hari ini lebih gemarkan untuk tahu apa yang mereka mahu, bukannya tahu apa yang mereka perlu tahu. Ini membuatkan mereka mulai berfikir kritis malah ada juga yang dilihat kearah yang lebih radikal.

Kita boleh lihat bagaimana segelintir remaja terpengaruh kepada militan IS yang kononnya mengajak kepada jihad yang sebenar. Dihidangkan remaja ini dengan segala ganjaran yang mereka idamkan – syurga, bidadari dan apa saja yang diimpikan oleh mereka yang inginkan syahid. Hakikatnya, perjuangan IS itu sebenarnya langsung tidak menggambarkan Islam yang sepatutnya.

Jati diri remaja kini juga diperolokkan dengan idealis-idealisme yang berpaksikan kebebasan hak asasi. Fitrah manusia yang sepatutnya dijadikan panduan ditolak ketepi demi nama kebebasan. Malah ketaatan kepada pemerintah dan negara juga dipandang sepi. Mereka melihatkan sistem yang sedia ada korup dan tidak relevan. Undang-undang dan perlembagaan hanya sekadar tulisan yang mengongkang kehidupan mereka.

Soekarno pernah berkata, “Jika mahu lihat negara dimasa hadapan, lihatlah pemudanya pada masa kini.”. Begitulah pentingnya untuk kita menjaga generasi yang akan menjaga negara pada masa akan datang. Pemuda adalah aset penting dalam jatuh bangun sesebuah negara.

Sesungguhnya didalam membentuk jati diri diri pemuda ini bukanlah sesuatu kerja yang mudah yang boleh disudahkan dalam tempoh yang singkat. Untuk mengembalikan Baitulmaqdis kepada Islam juga memerlukan tempoh masa bergenerasi sehinggalah munculnya generasi Salahudin Al-Ayubi. Sultan Muhammad Al-Fateh juga memerlukan satu tempoh yang panjang untuk menyediakan satu generasi tentera yang hebat bagi membebaskan Constantinople.

Maka perjuangan kita janganlah diharapkan untuk mendapat hasil yang segera. Apa yang diperlukan ialah usaha yang berterusan dan keazaman untuk melihat Malaysia kekal gemilang dimata dunia. “Jika kita mempunyai keinginan yang kuat dari dalam

hati, maka seluruh alam semesta akan bahu membahu mewujudkannya," demikian lagi kata-kata dari Soekarno.